

JAMHURI YA MUUNGANO WA TANZANIA

BUNGE LA TANZANIA



**AZIMIO LA BUNGE LA KUIPONGEZA TIMU YA TAIFA YA VIJANA WANAUME CHINI
YA UMRI WA MIAKA 17 (SERENGETI BOYS) KWA KUFUZU FAINALI ZA AFCON 2026
NA KUKATA TIKETI YA KUSHIRIKI MASHINDANO YA KOMBE LA DUNIA
LA VIJANA CHINI YA UMRI WA MIAKA 17 MWAKA 2026**

**OFISI YA BUNGE
29 MEI, 2026**

**AZIMIO LA BUNGE LA KUIPONGEZA TIMU YA TAIFA YA VIJANA WANAUME CHINI
YA UMRI WA MIAKA 17 (SERENGETI BOYS) KWA KUFUZU FAINALI ZA AFCON 2026
NA KUKATA TIKETI YA KUSHIRIKI MASHINDANO YA KOMBE LA DUNIA LA VIJANA
CHINI YA UMRI WA MIAKA 17 MWAKA 2026**

Mheshimiwa Spika, awali ya yote, napenda kukushukuru sana kwa kunipa nafasi hii adhimu na kwa mujibu wa Kanuni ya 64 ya Kanuni za Kudumu za Bunge za Mwaka 2025, niweze kuwasilisha Hoja ya Azimio la Bunge la kuipongeza Timu yetu ya Taifa ya Vijana Wanaume chini ya Umri wa Miaka 17 (Serengeti Boys) kwa mafanikio makubwa iliyoyapata hivi karibuni kwenye Mashindano ya Vijana ya Afrika (AFCON U17).

Mheshimiwa Spika, wote tumeshuhudia jana tarehe 28 Mei, 2026, Timu hii ya Serengeti Boys ikipata ushindi dhidi ya Timu ya Taifa ya Vijana ya Misri katika Mchezo wa Nusu Fainali. Timu yetu ilishinda kwa Mikwaju ya Penati 4 kwa 3 baada ya Timu zote kutoka suluhu ya bila kufungana hadi mwisho wa Mchezo huo uliofanyika Nchini Morocco.

Mheshimiwa Spika, kwa Matokeo hayo, Serengeti Boys wamefuzu kucheza Fainali za Mataifa ya Afrika (AFCON U17) ambayo inatarajiwa kufanyika Mwaka huu 2026. Aidha, pamoja na kufuzu kushiriki Fainali za AFCON U17, Timu ya Serengeti Boys pia imekata tiketi ya kushiriki Mashindano ya Kombe la Dunia kwa Vijana wa Chini ya umri wa Miaka 17 ambayo yanatarajiwa kufanyika Nchini Qatar Mwaka huu 2026.

Mheshimiwa Spika, ushindi huu wa Serengeti Boys na hatua waliyofikia kimichezo, ni jambo kubwa na la kihistoria ambalo halijawahi kutokea hapa nchini kwa muda mrefu. Timu hili inapaswa kupongezwa na kupewa Moyo, Ari na Hamasa kutoka kwa Watanzania wote tukiwemo sisi Wabunge ambao ndio Wawakilishi wa Wananchi. Aidha, ushiriki wa Timu ya

Serengeti Boys katika mashindano hayo ni fursa kubwa ya kuitangaza Nchi yetu Tanzania kimataifa na kuitangazia Dunia kuwa sisi ni Nchi ya Amani na kwa njia hiyo kukuza Utalii na Uwekezaji Nchini.

Mheshimiwa Spika, nitumie pia fursa hii kutoa pongezi nyingi kwa Rais wetu ambaye ndiye Mwanamichezo Namba Moja, Mheshimiwa Daktari Samia Suluhu Hassan kwa kuimarisha sekta ya Michezo kupitia uwekezaji mkubwa alioweka kwenye Michezo ambao unaleta motisha kubwa kwa Vijana wetu na Wanamichezo kwa Ujumla kuongeza juhudi za ushiriki katika Mashindano mbalimbali ambayo timu zetu na Timu ya Taifa inashiriki. Ushindi wa Serengeti Boys ni zawadi kubwa kwa Rais wetu Mpendwa na sisi Wabunge tunampa Moyo wa kuendelea kuinua Sekta hii ya Michezo.

Mheshimiwa Spika, Baada ya Maelezo hayo ya Utangulizi, sasa naomba uniruhusu niwasilisha Azimio hili mahsusi la Pongezi, kisha nitatoa Hoja ambayo kwa ridhaa yako nitaomba ichangiwe na Wabunge. Azimio lenyewe ni kama ifuatavyo: -

AZIMIO LA BUNGE LA KUIPONGEZA TIMU YA TAIFA YA VIJANA WANAUME CHINI YA UMRI WA MIAKA 17 (SERENGETI BOYS) KWA KUFUZU FAINALI ZA AFCON 2026 NA KUKATA TIKETI YA KUSHIRIKI MASHINDANO YA KOMBE LA DUNIA LA VIJANA CHINI YA UMRI WA MIAKA 17 MWAKA 2026

KWA KUWA, Timu ya Taifa ya Vijana chini ya umri wa miaka 17 (Serengeti Boys) ambayo inashiriki Mashindano ya AFCON kwa Vijana huko Morocco jana tarehe 28 Mei, 2026 ilipata Ushindi wa Mikwaju ya Penati 4 kwa 3 dhidi ya Timu ya Taifa ya Vijana ya Misri;

NA KWA KUWA, Ushindi huo wa Serengeti Boys umeiwezesha kufuzu Fainali za AFCON kwa Vijana chini ya umri wa Miaka 17 ambayo itafanyika Mwaka huu 2026. Vilevile, ushindi

huo umeiwezesha Serengeti Boys kukata tiketi ya kushiriki Mashindano ya Kombe la Dunia kwa Vijana chini ya umri wa miaka 17 litakalofanyika Mwaka huu 2026 nchini Qatar;

NA KWA KUWA, Ushindi huu ni jambo kubwa na la kihistoria katika Maendeleo ya Soka na Michezo hapa Tanzania, kwani kwa miaka mingi timu zetu za hapa nchini hazijaweza kufikia mafanikio na hatua kama hiyo;

NA KWA KUWA, Ushiriki wa Timu ya Serengeti Boys katika mashindano hayo utaitetea Tanzania sifa kubwa Kimataifa, kutangaza Utalii wa Nchi yetu, kuvutia uwekezaji na kuithibitishia Dunia kwamba Tanzania ni Nchi ya Amani;

NA KWA KUWA, Maendeleo ya Michezo hapa Tanzania yanachochewa na Wadau mbalimbali akiwemo Kiongozi Mkuu wa Nchi yetu, RAIS Daktari Samia Suluhu Hassan ambaye amekuwa mstari wa mbele katika kuhamasisha Michezo;

NA KWA KUWA, Ushindi wa Serengeti Boys ni jambo linalopaswa kupongezwa na Watanzania wote hususani sisi Wabunge ambao ndio Wawakilishi wa Wananchi;

KWA HIYO BASI, Katika Kikao chake cha Thelathini na Tisa cha Mkutano wa Tatu wa Bunge la Kumi na Tatu, Bunge linaazimia: -

- (i) Kuipongeza Timu ya Serengeti Boys kwa ushindi ilioupata na hivyo kufuzu kushiriki Fainali za AFCON na pia Kombe la Dunia kwa Vijana Chini ya umri wa miaka 17 kwa Mwaka huu 2026;
- (ii) Kuipa Timu ya Serengeti Boys Moyo, Hamasa na Ari ya kupambana katika Fainali hizo walizofanikiwa kuingia ili hatimaye wapate ushindi na kuiletea Tanzania sifa nzuri; na

(iii) Kumpongeza Mwanamichezo Nambari Moja Tanzania, Mheshimiwa Daktari Samia Suluhu Hassan, Rais wa Jamhuri ya Muungano wa Tanzania kwa kuinua na kuhamasisha Sekta ya Michezo Nchini.

Mheshimiwa Spika, Naomba kutoa Hoja.

Mhe. Esther Amos Bulaya

MBUNGE – BUNDA MJINI

29 Mei, 2026